

四庫全書薈要

• 乾隆御覽本

集部

欽定四庫全書薈要

集部

御定歷代賦彙外集卷六

七



御定歷代賦彙外集卷六

言志

明意賦有序

晉傅咸

御定歷代賦彙外集
明史傅咸奉詔治獄作賦用明意云

舍控款以彌載令棲遲以淹留吏砥身以存公古有死
而無柔彼背正以從邪我沒世而是尤敷腎腸以為效
兮豈文飾之足修感恩輸命心口自滅加我數年竭力

效節春秋既不吾與日月忽其不屈周道兮如砥吉人
兮是由材曲兮枉撓朽木兮難抽

釋懷賦有序

唐李翱

讀黨錮傳哀直道之多尤不容作釋懷賦其辭曰

懷夫人之鬱鬱兮歷晦蚤而傷離吾心直以無差兮惟
上天其能知表於德而必好兮忠何尤而甚疑彼陳詞
之多人兮胡不去衆而訊之進盡言之不信兮退遠去
而不獲弗驗實而考省兮固余道之所厄昔師商之親

聖兮德既均而行革惟肝腸之有殊兮守不同其何責
願披懷而竭聞兮道既塞而已行路非險而不通兮人
忘我而異情王章直而獄死兮李固忠而陷刑自古世
之所悲兮矧末俗之衰誠哀貞心之潔白兮疾苗莠之
紛生令農夫以手鉏兮反翦去乎嘉莖豈捐穢而語之
兮詳瞪瞶而不肯聽欲釋去而不忍兮終留滯亦何成
當晨夕而步丘兮仰白日而自明處一世之若流兮何
久求而傷情樂此言而自抑兮壯大觀於兢生拔馨香

之蒞蘭兮樹蒿蔚以羅列斥通路而使蕪兮戀棘逕之
中絕置春秋而徇心兮羗與此其奚別昔誓辭而約文
兮期共死以皆居嗟所守之既異兮乃漫汗而遺初心
皓白而不容兮非市直而望利忠不顧兮立忘交不同
而行棄悲夫不徇已而必仇兮諒非水火其可畏猥吾
行之不然兮直愧心而懼義嘉山松之蒼蒼兮歲苦寒
而亦瘁吾固樂其貞剛兮夫何尤乎小異欲靜默而絕
聲兮豈不悼厥初之所志抑此懷而不可兮終永夜以

獻歆

幽懷賦 有序

唐 李 翱

朋友有相歎者賦幽懷以答之其辭曰

衆蹢蹢而雜處兮或嗟老而羞卑視予心之不能然兮
慮行道之猶非儻中懷之自得兮終老死其何悲昔孔
門之多賢兮唯回也為庶幾越羣情以獨去兮指聖域
而高追固簞食與瓢飲兮寧服輕而駕肥望若人其何
如今慙吾德之纖微躬不田而飽食兮妻不織兮豐衣

援聖賢而比度兮何僥倖之能希念所懷之未展兮非
悼已而陳私自祿山之始兵兮歲周甲而未夷何神堯
之郡縣兮乃家傳而自持稅生人而育卒兮列高城以
相維何茲勢之可久兮宜永念而遐思有苗之逆命兮
舞干羽以來之惟政刑之既修兮無遠邇而咸歸當高
祖之初起兮提一旅之羸師能順天而用衆兮竟掃寇
而戡隋況天子之神明兮有烈祖之前規劃弊政而還
本兮如反掌之易為苟廟堂之治德兮何下邑之能違

哀余生之賤遠兮包深懷而告誰嗟此誠之不達兮惜
此道而無遺獨中夜以潛歎兮匪吾憂之所宜

幽懷賦

元 朱德潤

肇姬封之邾裔兮老睢陽之曾孫歷淮漢而屆都兮瞻
邦畿之無垠茂品物之化育兮醞六合而俱春攬太古
之象教兮齊民風而俗淳何世隆兮謂其時兮欲窮而
怵生兮寵專而勢危物情膠而讜論廢兮異端行而政
教虧禮度疎兮豪猾僭兼并盛兮良民饑饉寒迫兮廉

恥喪苞苴行兮仕祿卑淫祀盛兮正直塞游食多兮末
技施我思古人兮邈其遠而觀所行兮或放或持盡大
智兮勿機躬力行兮弗馳享尊榮兮弗榮臨患難兮弗
欺苟余心之無嫌雖衆毀而何疑豈矯世兮獨立俟同
心而可為嗟盛年之不偶撫朱絃兮自悲儻效用之得
所雖沒身其何辭秋風兮木落遠道兮陸離取幽懷之
惓惓兮慕重華而致詞顧臯夔之謨明兮歷康衢而歌
之

秋懷賦

宋 劉 攽

世量力以為智兮孰不自師其成心不强短以彼修兮
亦各濟其所任蓋周任之明清兮予嘗服於德音性專
直其似愚兮遂底滯而廢沈惟古人有不遇兮亦奚慨
於斯今昔既冠而從仕兮冀陳力而帥職何日月之不
淹兮疊疊至乎不惑世與我其異衷兮增余懷之默默
數廢日而倍參兮願自竭而安得將奔而及事兮愧初
心而變色譬游者之無術兮念愈躁而愈沒荷衆賢之

并容兮曾介善之不遺辱興廉之末舉兮遂以造夫攸
司君之門不可以徑入兮既待詔而歷時唯偏心之捐
狹兮樂繩墨其自持誠詭遇其有獲兮雖得獸而恥之
信天命之有在今非智勇其孰勿疑時既秋而涼風兮
草木落而變衰日月麗於西廂兮蟋蟀迅而鳴悲閱四
序之代謝兮既逝者之如斯悼我心之弗獲兮起惆悵
而稱詩

壯懷賦有序

明
黃尊素

予幼落拓不肯斤斤作俗士面目長逢數奇歲月漫漫
壯懷未展每思往昔豪士縱神所往自許必遂豈有跼
蹐竊穴中碌碌此身邪易水旣眇壯士空歌翔風唾壺
尚在老馬忍甘伏櫪因感而賦焉

眇眇七尺有軀與質為隱為見同歸於息惟神獨往超
世獨立能汗漫於九垓兼馳騖於八極高欲與鷗鷺比
翔卑不與雞鶩爭食憶昔楚有二胥一覆一復去時矢
盟別後自戮或就蘆中而覓津或赴秦庭而痛哭途窮

而白骨答師出而封豕逐若夫會稽囚臣伯越亡吳遊
麋鹿兮蘇臺乘煙浪兮五湖變鴟夷兮遠遁笑屬鏐兮
何辜若乃咸陽鑄金胡亥踐阼傭耕養鴻鵠之羽戍卒
築鯨鯢之渡揭竿斬木社沈廟墮長城遂傾阿房非故
若乃蘇卿漠北一鴈孤飛聽胡笳而情斷望隴雲而魄
馳見節旄之盡禿寧甘心於乳羝謝朝露之陔言噬臍
雪而何辭至如寄絲桐江混迹羊裘漁舟唱晚釣石蘆
秋領浦口之風月辭麟閣之遠猷星已分於客帝貴不

辨乎王侯至於祭酒布衣投筆而起繫馬於龜茲部下
斬首於烏孫帳裏諸番匍匐稱壽都護端居自喜玉門
回轅定遠開址或乃少年健兒別妻從軍擊楫中流之
濤請纓金馬之門鳴劍則蛟龍夜吼展旗則風雲晝屯
乍棄繻而出塞忽奏凱而銜恩或乃照藜書生生花詞
客歌叢桂於小山賦長楊於鳩鵲筆精墨妙神驚鬼泣
買賦皇宮藏書石室或乃成仁志士報國孤心舌能罵
賊血可濺襟嬰城矢石之衝厲聲劒戟之林山河震而

色慘風雲蔽而回陰或有信陵義魄朱家俠腸意至鞭
石可橋心許投鼎何傷符竊而晉鄙椎髡鉗而亡命藏
卒能脫邯鄲於虎口守季布於淮陽自古及今莫不有
落落之豪懷英英之氣岸吞河岳以為雄貫星虹而俱
燦若游魚之逝淵而犀然莫窺若雕鷲之橫空而風高
獨戰雖劫燼而不灰至海枯而不變僕亦壯人壯懷未
隕紉蕙茝而獨馨嗤三閭之自窘木經霜而愈堅劍礪
石而不損願蹀躞於天衢乘長風於一瞬於時揮就鸚

鵠飛動江關勢驚鉅鹿之軍氣壯朔方之垣女媧之石
天補魯陽之戈日還其漂疾而難禦也如廣陵之潮其
嶙峋而莫躋也如峨眉之山攜夸父之杖而太陽可逐
乘博望之槎而星漢可攀南則鑄柱交趾北則勒銘燕
然爾乃挂梅冠解疏綬結茅屋穿石竇尋素心之侶鞭
達生之後相與風清垂釣雲深採藥買青山而招隱覓
孤舟而放鶴晝吟離騷之章夜談黃庭之略訪禪支遁
攜屐康樂林不厭深流不厭濁思蓴羹於千里問旨酒

於下若目前不必問天餘生亦已有幾窮愁是述陋彼
虞卿孤憤著書是卑公子吾黨如可披心為道壯懷如
此

思還淳賦

唐 吳筠

伊太素之玄風迨義軒而浸隱雖朴散以成器暨唐虞
而未泯淳化日以淪亡及殷周而殆盡唯挺生之尼父
覩澆漓而致憫乃修詩書制禮樂以救崩隕將驅末駕
以旋軫玄元適彼流沙遺道德於闕尹信文約而義蹟

俾浮競以返本固天運之推遷雖聖人亦不能扶其顛
隕五霸既沒七雄交馳爰至暴秦儒殘道隳皇漢底定
人懷緝熙孝文御宇所向無為刑法幾措歡心秉彞孝
武好夫征伐亦兼崇於典儀雖純懿未舉而文章載施
元成懦弱政教陵遲彼蒼生息肩之日在世祖中興之
時何孝明之匪德為祆夢之所眩創式神之祠宇遵恍
惚之妄見始涓涓於濫觴終浩汗以流羨歷三國而猶
微更五胡而大建華夏之禮廢邊荒之風扇沴氣悖以

興行人心颯以傾變遂侮君親蔑彝憲髡跣貴簪裾賤
事竭思以徼福芳含疑而懼譴上發跡於侯王下無勞
於獎勸尊曩負之金狄列崢嶸之紫殿伐千畝之竹不
足紀荒唐寓言傾九府之財焉能充惻款誠願於是寶
樹瓊軒凌雲照日鏗鏗窈窕不可談悉越章華之宏壯
羅區宇而櫛比棟宇以來未有儔匹重貝葉訛謬輕先
王典籍欽刑賤鄙夫宴廣廈精室使白屋終勞緇門永
逸自國至家祈虛喪實虔而是者則給之以嘉祥沮而

非者則欺之以罪疾故中智已下助成其姦宄之術可
謂至真隱大偽出所以孽黨妖徒此焉遊息儲不因耕
衣不俟織誘施冒貨鯨吞蠶食若蛟螭之在水猶豺豹
之附翼罔不假小善以外慈藏深邪而內賊豈止一時
之封豕乃為萬代之蝨賊足使宵人得意而傲睨上士
傷心而憫默於戲天道乎人事歟天道遠而難曉人事
近而可詳雖孽自天啓亦祇由人彰斯乃鍾劉石之兩
羯偶符姚之二羌憑胡書之詆譎資漢筆以闡揚道安

討論於河洛惠遠潤色於江湘圖澄挾術以鼓舞羅什
聚徒以張皇跡無徵於班馬理唯竊於老莊裒蠶取為
中上貶諸夏為偏方務在乎噬儒吞道抑帝掩王奪真
宰之柄操元化之綱自古初以逮今未有若斯之弊逆
天暴物干紀亂常爰自晉宋迄於齊梁靡不興之者滅
廢之者昌竟流遁而不返終取悔以危亡考其故何哉
蓋蓼蟲忘辛習其久翫將助其理反增其亂若運窮數
極則君悟臣斷億兆不謀而密移神祇應感而冥贊山

川為之澄穆日月為之炳煥自然朝思文明野冀貞觀
譬曾冰之堅積非陽春不能使之剖泮當是時也太上
有命爰徵萬靈敕司姦以糾慝遣執法以詳刑五帝合
符三皇同征乃命天將總天丁伐天鼓揚天旌揮金鑲
擲火鈴使列缺激迅霆出昭曠入杳冥捕無影搜無聲
獲妖師殲氛兵正太階埽欃槍盪遺祲於千載流惠澤
於八紘班師下土歸功上清然後人倫可以順化神道
可以永貞變訛僻之俗為雍熙之化佇淳風之克復吾

乃鼓腹擊壤於巖垆吟松柏皇與驪連大庭而已矣

傷已賦

宋 謝靈運

嗟夫卞賞珍於連城孫別駿於千里彼珍駿以貽愛此
陋容其敢擬丁曠代之渥惠遭謬眷於君子眺徂歲之
驟經覩芳春之每始始春芳而羨物終歲徂而感已貌
顛顚以衰形意幽翳而苦心出衾裯而載坐闢襜幌以
迴臨望步檐而周流眺幽閨之清陰想輕綦之往跡餐
和聲之餘音播芬煙而不燠張明鏡而不照歌白華之

絕曲奏蒲生之促調

傷已賦

元馬祖常

嗟余生之多憂兮幾顛路而數窮
誓續言以自見兮力
追古之高風呼天龍以駕我兮
伴天使使為期何九稼
之不一獲兮尚偃蹇而如茲
豈剗剔之有不善兮將世
德之下移薦芻莛於宗器兮
綴履綦以璿璣封敦旒以
塊泰岱兮謂汎濫其莫涯
冠髻童以弁冕兮問禮意而
莫知決大疑於淫鬼兮憑巫
傳以度揆顧聖言之戰勒

兮指網維為械繫憫相通之無朋兮去一髮之幾希柅
吾車之莫騁兮膠吾口之難辭懲前悔之不憚兮配古
道其或可思一旦舍此而改圖兮念後余之病我日浚
惡以啓堙兮患世之屏經而好權遭岐蹊之多迷兮世
或謂其固然抱昌辭以適與我兮俟來學以偕行辨百
家之糾紛兮孰察余之衷情亂曰我涉大波孰為航兮
我載大塗孰為箱兮古聲嗶嗶金石之揚兮世無俟兮

閔已賦

唐

韓愈

余悲不及古之人兮伊時勢而則然獨閔閔其曷已兮
憑文章以自宣昔顏氏之度幾兮在隱約而平寬固哲
人之細事兮夫子乃嗟歎其賢惡飲食乎陋巷兮亦足
以頤神而保年有至聖而為之依歸兮又何不自得於
艱難曰余昏昏其無類兮望夫人其已遠行舟楫而不
識四方兮涉大水之漫漫勤祖先之所貽兮勉汲汲於
前修之言雖舉足以蹈道兮哀與我者為誰衆皆舍而
已用兮忽自惑其是非下土茫茫其廣大兮余壹不知

其可懷就水草以休息兮恒未安而旣危久拳拳其何
故兮亦天命之本宜惟否泰之相極兮咸一德而一違
君子有失其所兮小人有得其時聊固守以靜俟兮誠
不及古之人兮其焉悲

閔已賦有序

元任士林

正月八日獨坐雷公山中天氣風緊抱書自憐漸老醜
之逼人慨盛時之不再匪私驛角恐墜肩牆作閔已賦
庶幾成此志耳其辭曰

肆后皇之嘉貺具藐然之一身戴玄髮於芳鬢含纖齒
於麗脣匪肖貌之我私獨降質之爾淳有賦予之重責
尚隆緒之大振張余挾於幼眇自青襦而裹巾亦淳濯
於羣污窺末光於德鄰孔孟吾之師不可以復夢兮為
誰門之人顏賜吾之友不可以遽作兮為誰居之羣倚
泰山而長嘯俯黃河而孤嘶瞻飛雲於月下訪流水於
回堤謂雲行而月跋兮亦升東而沈西謂水逝而隄在
兮忽高岸之為谿理不可以逆曉事不可以深稽去者

非人之所推陷者非人之所擠來者不可以逕遇降者不可以驟躋眇余思之茫茫隱余神之淒淒匪饑寒之足慮匪患難之足疑恫大志之未立矧絕學之無依人不能憂余之憂兮余亦不能悲人之悲聊走筆以自係走四方而陳詞庶聖道之未沫將援余之孤危

閔生賦

唐
柳宗元

閔吾生之險阨兮紛喪志以逢尤氣沈鬱以杳眇兮涕浪浪而常流膏液竭而枯居兮魄離散而遠遊言不信

而莫余白兮雖遑遑欲焉求合喙而隱志兮幽默以待
靜為與世而斥謬兮固離披以顛隕騏驥之棄辱兮驚
駘以為騁玄蚪蹶泥兮畏避鼃黽行不容之崢嶸兮質
魁壘而無所隱鱗介槁以橫陸兮鳴嘯羣而厲吻心沈
抑以不舒兮形低摧而自慙肆余目於湘流兮望九疑
之垠垠波淫溢以不返兮蒼梧鬱其蜚雲重華幽而野
死兮世莫得其偽真屈子之悵微兮抗危辭以赴淵古
固有此極憤兮矧吾生之藐艱列往則以考已兮指斗

極以自陳登高巖而企踵兮瞻故邦之殷鑠山水浩以
蔽虧兮路翦勃以揚氛空廬頽而不理兮翳丘木之榛
榛塊窮老以淪放兮匪魑魅吾誰鄰仲尼之不惑兮有
垂訓之謦言孟軻四十乃始持心兮猶希勇于黜貴顧
余質愚而蓋減兮宜觸禍以貽身知徙善而革非兮又
何懼乎今之人噫禹績之勤備兮曾莫理夫茲川殷周
之廓大兮南不盡夫衡山余囚楚越之交極兮邈離絕
乎中原壤汙潦以潰如兮蒸沸熱而恒昏戲鳬鵲乎中

庭兮蒹葭生於堂筵雄虺蓄形於木杪兮短狐伺景於
深淵仰矜危而俯慄兮弭日夜之拳拳慮吾生之莫保
兮忝代德之元醇孰眇軀之敢愛兮竊有繼乎古先明
神之不欺余兮庶激烈而有聞冀後害之無辱兮匪徒
蓋乎曩愆

閔獨賦

宋 宋 祁

閔前人之抗志兮雖有適而遂迷恃我醒於皆醉兮矜
獨是於衆非吾固知高木不得林兮孤音鮮與之諧特

立廢於曹路兮一妍掩於萬姪舉吾黨以同寐兮挈予
覺其何之越家祀而訶冕兮裸戶程而晒衣奮單辭以
正議兮安足救輿談之參差發介瞭之精覽兮何預羣
蒙之佞嬉屈自高以赴淵兮夷已信而餓微波潰流而
無益兮返蒙譴而被訾兮吾有道於此兮請質古而瑩
疑狂者以不狂者為狂兮飲泉流而後宜非聖者以聖
為非兮均獵較而免譏挫爾方而殺廉兮常偶成而儷
悲保獨行以中晦兮庶明哲而為期

擬閔獨賦

明 葉良珮

閔諒貞之獨立兮，跼衆險以乘危。塞離披以隕穫兮，循
本初而自思。始余之未有知兮，專六籍以爲師。朝帶經
於兒圃兮，夕發憤乎董帷。物何幽之不鏡兮，理何微而
不窺。旣釋褐以從政兮，棼亂絲其難治。索慮謀於古訓
兮，判與彼而異宜。心無歸之茫茫兮，疑簡策之我欺。步
徙倚而遙思兮，寐展轉而反側。惟困極其必通兮，神恍
惚若有得。曰道有玄機兮，而靡定式。乘時制用兮，妙存

悟識親賢爾輔兮稽古自益任重惟毅兮篤信靡惑惕
靈魂以驚悟兮奉神貺以周旋抽詩書之祕訣兮萃仁
友以討論遺驪北之粗迹兮溯九河兮崑崙披義途於
棘榛兮排私闥以為禮門塞木蘭繼余佩兮扈芳洲之
芷蓀冠切雲之寶弁兮明月懸乎帶擎衆讒嫉之弗回
兮猶岌岌乎疇昔之言夫唯被服之魁崔兮衆果蔑然
而忌之加以險詖之偽名兮乃集羣怒而噬之衆口垂
涎之澆漓兮張怒目而睚眦怵鬱悒余煩冤兮雖百喙

莫之能解豈不澀情以陳辭兮荃詆余之善誑競面服
而背憎兮反撫余言以肆謗騃矰弋之在上兮覆深淵
而在下仰側身以發機兮俯置足之靡所念余初志之
好修兮今何以侘傺而邁殃將惟語言以階亂兮無亦
擇交之不詳世舉好朋而惡異兮余獨蹈其所怪揭吾
日月以孤行兮豈不招尤於曖昧仗貞信於幽明兮全
形軀之已多及年歲之未晏兮修初服其謂何襲余芳
兮鏤余彩坐若忘兮行若待中以為廬兮和以為馬馳

驚於順適之塗兮休息乎曠漠之野衆之不可勝兮險
不怙乎再試頌吾過以成章兮書爾紳以自識

閔貞賦

明 楊守陞

夫何一佳人兮塊獨處而無侶朝悒悒以至暮兮夕營
營而達曙言我家良而族茂兮幼連娟以好修珥瑤碧
而佩寶璐兮戴孔雀之搔頭攬薜荔以克幃兮緝蕙蘭
而為綈光陸離其繽紛兮芳與澤其雜糅慕闕雎之窈
窕兮冀君子之好逑藉蹇修以為理兮執高門之箕帚

葛蘿附於松柏兮吾懼夫身輕而施厚覽圖史以自監
兮哀哲婦之傾城思雞鳴之賢耦兮恒警戒而相成翳
靈修之高義兮方采芹於泮池懷青萍與結綠兮俟和
燭其予知將榮耀以貽寵兮矢偕老以為期何大厲之
嫉妒兮羌中道而奪之如涉川而無航兮如凌霄而失
梯豈妾人之殃咎兮抑天命之不可違易珠翹以麻髮
兮代羅裳以總衰泣既盡而繼以血兮心怛絕而復悲
天陰陰其欲雨兮景翳翳而將晡燕飛飛而歸梁兮雞

登時而相呼宵燭黯其無光兮撫孤孩於坐隅搏哀苦
以為枕兮結愁思以為衾依苦席以假寐兮恍若君之
幸臨乍悲喜而欲言兮怛警悟而惕心猶傾耳以馳想
兮似聞君之聲音終悄悄其闐寂兮哀四壁之蟲吟欲
夜哭而不可兮淚浪浪而不禁朝進拜於殯帷兮奠桂
漿與椒醕芬吖第而不饗兮怵鬱邑余誰語人與歲而
偕逝兮暑與寒其代序念死生之異制兮卜宅兆而安
厝薤歌淒其載塗兮柳輦儼以即路雪霏霏其交零兮

冰漣漣其將汙獸挺走而失羣兮孤雌峙於遠樹抱玄
纁以臨穴兮欲殺身而為殉憐幼穉之重孤兮又低徊
而不忍暮反哭於故宮兮氣奄奄其欲盡何昔日之甘
薺兮今直為此堇荼也哀吾同室之人兮溘先委於山
隅也倏祥禪之既踰兮人告余以從吉惟夫死為未亡
人兮吾心喪其猶未畢彼媒妁之嬋媛兮迺申申其煩
言曰琴與瑟宜更張兮鏡已破而重圓汝何瑯居而自
苦兮終槁死其誰憐曾歔歔其佗傺兮媒莫察余之衷

情烈女不更二夫兮在古訓則明明詠柏舟於共姜兮
悲黃鵠於陶嬰凝妻引斧以斷臂兮梁寡操刀而殘形
令女蒙被以流血兮荀氏以衣帶而自經吾悲不及古
之人兮又何能踐夫二庭琰失身於外國兮嗟悲憤其
何如易安自辱於駟儈兮空嗟咤於桑榆苟大節之一
虧兮又何取於雕蟲之緒餘吾亦知嫠居之無聊兮忍
而不能辭也指蒼天以誓心兮雖九死而不移也擘松
枝以掩涕兮倚修竹而延佇沾余室之翹翹兮閔鬻子

之良苦勉拮据以綢繆兮雖卒瘁而莫顧歲習習其若
頽兮時冉冉其衰暮哀良人之日遠兮渺英靈其何處
命靈芬以占筮兮召巫陽而問故曰兩美其不終兮孰
知其英靈之所寓匪修文於地下兮將玉樓成而作賦
勉陟降以求索兮或庶幾乎一遇假蓬萊之仙輶兮驂
螭蚪而橫驚邀金母使前導兮招麻姑使為御朝發軔
於扶桑兮夕余至乎湘浦謁重華之二妃兮睇蒼梧之
抔土事同心而相感兮淚斑斑其如雨道岷峨而弭節

兮文君續其來迎余惡其失節於臨邛兮疾驅駕而不
停縱余轡於沙漠兮嗤王嫱於青丘爾何嬖於二酉兮
為中華之遺羞朝騁燕而莫越兮遇浣紗之西施憤尤
物之喪邦兮誰將戮乎鴟夷周下土而不見兮將乘雲
而上征封姨先驅以清塵兮嫠女從余以揚靈泝天津
而遵河渚兮見河東之織女隔夫君於一水兮亦脈脈
而不得語雖嘉會之不常兮永相望於終古步蟾蜍而
入月兮拜嫦娥於桂下后羿死已千載兮猶孤眠而不

嫁惟廣寒之清光兮照萬古之長夜屬纖阿以啓塗兮
適太微之所居羌中心之憤鬱兮將叩閤而問諸蹠何
為而壽兮淵何為而夭共姜賢而早寡兮夏姬淫而三
少莊姜仁而不遇兮嫫母醜而自好惟兩美其必合兮
胡不與之偕老孰主張乎是兮而施之顛倒死者其何
之兮乃冥冥而杳杳將乘化以歸盡兮抑輪迴於六道
何上下而不遇兮增余心之悄悄望閭闔之洞開兮蹇
欲進而躊躇念下土之臣妾兮敢冒昧而干誅申禮義

以抑情兮聊逍遙以自舒回余車以復路兮卒稅駕於
故廬仰旌閭之赫奕兮輪奐輿飛而凌雲金書奕其焜
耀兮曰表余貞節之門鷄雛翮其高舉兮隨九霄之鸞
羣願竭忠以趨勞兮報乾坤之渥恩余雖老死而無憾
兮將藉手以見吾良人庶無愧於婦道兮光彤史於千
春

居閔賦

明夏鏞

居邑邑以無故兮莫時命之大乖抑所遭之不猶兮記

前聞以興懷二八生而選虞兮傳巖築而登台偉姬旦
其何人兮下白屋之微才孔曰鮑叔其賢兮實道寸桓以
相賊矧常何之備武兮忘驟薦乎家客悲此義之不斷
兮胡天經之與地則苟青紫之既登兮班濟濟而忌刻
羣奉已以上下兮謂元元其疇依惟余心之不然兮廁
孤憤於羣嘻豈肉食之為鄙兮曾布衣之有知感鄧生
以杖策兮叫帝閭而謂之嗟此願之不遂兮恒日夜之
怫怫忽掩卷以長歎兮將投筆而趨耕聊徙倚以登眺

兮薄遐想於青冥悵天道之幽玄兮考古人之攸行寧
子伏而商歌兮三閭放而楚聲其一舉以該輔兮一從
彭咸之故也豈累其劣而溘兮固興亡之數也苟此理
其或然兮吾將蕩而不慕也樂得此以卒歲兮茲未久
其又寤也昔尼父之年老兮有歸與之歎音彼賈生之
不羈兮終泣涕而隕身非夫人之好榮兮固懷鬱鬱其
難任眇余身之不量兮志瀕涸其無堪奏黃鍾於瓦釜
兮冀堯舜於君民抗危辭以激烈兮忘此身之賤貧譬

負山之蚊蚋兮為昭代之杞人衆與我而不和兮婉相
告其猶疑競貪婪以交征兮謂清士之非宜紛婁媿以
干寵兮謂靜女為弗奇毀方為賢兮緘默為忠揭囊為
利兮被服為榮居上為顯兮位超為通圖惟其始兮不
慮其終謂天蓋高兮后土蒙蒙陰隲為誑兮殃慶害從
諄曰野響合節兮大音不諧儉人得路兮正已無階吁
嗟然兮吾將與達人以忘懷

懲咎賦

唐

柳宗元

懲咎愆以本始兮孰非余心之所求處卑汙以閔世兮
固前志之為尤始余學而觀古今怪今昔之異謀惟聰
明為可考兮追駿步而遐遊潔誠之既信直兮仁友藹
而萃之日施陳以繫縻兮邀堯舜與之為師上睢盱而
混茫兮下駘詭而懷私旁羅列以交貫兮求大中之所
宜曰道有象兮而無其形推變乘時兮與志相迎不及
則殆兮過則失貞謹守而中兮與時偕行萬類芸芸兮
率由以寧剛柔弛張兮出入綸經登能抑枉兮白黑濁

清蹈乎大方兮物莫能嬰奉訐謨以植內兮欣余志之
有獲再徵信乎策書兮謂炯然而不惑愚者果於自用
兮惟懼夫誠之不一不顧慮以周圖兮專茲道以為服
讒妒構而不戒兮猶斷斷於所執哀吾黨之不淑兮遭
任遇之卒迫勢危疑而多詐兮逢天地之否隔欲圖退
而保已兮悼垂期乎曩昔欲操術以致忠兮衆呀然而
互嚇進與退吾無歸兮甘脂潤乎鼎鑊幸皇鑒之明宥
兮繫郡印而南適惟罪大而寵厚兮宜夫重仍乎禍譴

既明懼乎天討兮又幽慄乎鬼責惶惶乎夜寤而晝駭
分類磨礱之不息凌洞庭之洋洋兮汨湘流之汨汨飄
風擊以揚波兮舟摧抑而迴遭日霾曠以昧幽兮黜雲
涌而上屯暮屑窅以淫雨兮聽嗷嗷之哀猿衆鳥萃而
啾號兮涕洲渚以連山漂遙逐其詎止兮逝莫屬余之
形魂攢戀奔以紆委兮束洶涌之崩湍畔尺進而尋退
兮盪洄汨乎淪連際窮冬而止居兮羈縻禁以縈纏哀
吾生之孔艱兮循凱風之悲詩罪通天而降酷兮不亟

死而生為逾再歲之寒暑兮猶質質而自持將沈淵而
隕命兮詐蔽罪以塞禍惟滅身而無後兮顧前志猶未
可進路呀以劃絕兮退伏匿又不果為孤囚以終世兮
長拘繫而輾轉曩余志之修騫兮今何為此戾也夫豈
貪食而盜名兮不混同於世也將顯身以直遂兮衆之
所宜蔽也不擇言以危肆兮固羣禍之際也御長轅之
無橈兮行九折之義義却驚懼以橫江兮泝凌天之騰
波幸余死之已緩兮完形軀之既多苟餘蓋之有懲兮

蹈前烈而不顧死蠻夷固吾所今雖顯寵其焉加配大
中以為偶兮諒天命之謂何

省愆賦

宋唐庚

唐子謫居嶺表既已半載杜門時省愆而慨曰身邪心
邪孰陷吾於罪乎吾將求之身則身非我有四大所會
地水火風誰為之宰吾將求之心則心不在內復不在
外不在中間是將安在晝夜以思寢食皆廢骨為之出
髮為之改夢有告余曰甚哉子之蔽也罪性本空念念

滅壞反復尋繹祇益咎悔道逢臭腐何足盼睐玩味不
已適足自穢淨是妄而况垢穀猶無而矧稗譬之身體
本自安泰或作病想便若嬰瘵識此病之誰受尚何施
於砭艾譬之手足伸縮無礙忽作縛想舉動輒絀悟此
縛之無實即無繩而可解方聳聽於妙語失胷中之結
塊若春動而冰坼若秋至而葉敗回視無始以來幾千
萬世所作罪業悉消散而崩潰矣豈獨今之所以流落
顛沛者哉覺而思之曰噫此殆維摩語也攬衣而起正

冠束帶稽首西望作禮而退

省咎賦

明 李夢陽

伊余幼好此騏驥兮服偃蹇以驕驚載銜轡而周流兮
耿旣得此中路余謂秉質曷固兮謂蘭蕙介而過疑援
鳴鳩使為理兮俾高舉而並馳旣倖直而不豫兮又任
怨而于際固羣吠之難犯兮每陷危而弗懼余豈不知
蹉蹉者之寡完兮羌堅忍而弗懲驟諫諍以離尤兮莽
飄風之相仍交不深而易絕兮儻中道而改度媒阻絕

之不通兮，焉孰導余以前路？放子嗟而掩涕兮，逐臣去而不還。紆鬱邑以屈抑兮，恐日薄於西山。浮洋洋余馬，極兮濫逶迤而游淫。相曹梁之廢墟兮，攬長河之緒風。信孔樂非我願兮，望北嶺而歛歛。效桃鳥以自珍兮，邁羅網之不意。憐赫夏以桎梏兮，雷無雲而晝鳴。愍棘扉之卑惡兮，夜不見月與星。吾聞湯文遭紮兮，豈其博修之故？惟鄙人之不揆兮，固宜蒙詬而逢怒。步庭階而遙望兮，宮殿鬱而槩天。願陳志之無路兮，倚北戶而嬋媛。

觀災疢之塌埃兮地沮洳又蕪穢哭與泣之相聞兮對
飲食而不能下怨長日而望夜兮夜明闇又若歲蚊蝎
伺人以唐旁兮鼠登牀而鳴逝怵宅際余隱軫兮哀民
生之多蠱數惟萬變豈其可繫兮孰泐忍而不踰援往
聖以為程兮按余志且焉止戢夢忽乎余上征兮魂浮
游之逖逖過太儀叩天閭兮捫白榆之歷歷進不入以
遭迴兮退余將覽天下土馮玄雲以相羊兮洵極樂而
無所撫辰星以攄慮兮擬雄虹而降觀飲積清之浮涼

兮依北斗而浩歎何民生之錯雜兮紛既有此多難心
猶豫而內訟兮悔有目之不見寤周覽以增歎兮塊獨
處此幽域鳴鴉萃而翔舞兮鳳鳥飢而夜食衆覲皆以
自媚兮焉誰察余之慢慢閔芳華之零落兮秋風至而
改期颺蕭颺以摧容兮天淫淫又陰雨幽屋破而下淋
兮牀一夜而十徙恹蘊憐以省故兮冀一見之不可得
日昧昧以將入兮掩衾裯而太息惜余年之強壯兮常
坎軻而滯留憐鬢黟之漸變兮恐芳草為之先秋情有

感而難忘今性有糾而不釋念昔日之周渥今孰堅忍而拋擲闌紆壹以忤瞽今竊陳詩以自抒懼言弱而道阻今恒潛隱而思慮

離譖賦

有序

明楊士奇

余讀揭文安公所為幽憂賦為其友辨謗累數百言既恐不能白於前又恐不能信於後揭文安公真盛德哉今之被謗類是者未聞有一人如文安公者為之辨古今相去豈遠邪非其知之者寡歟為賦以解之

離譖毀之橫發兮志沈鬱而弗宣指屢行為淫僻兮余
憤惋以代言惟弱操其好修兮穆員冠而履方被蘋霞
以為衣兮攬素霓以為裳援古人之高駕兮將馳騁乎
雲之路豈發軔猶未遙兮遽捐矩而改錯襲仁智以自
重兮乃承謗而逢尤肆腥膻其酷烈兮又何有乎杜蘅
與江離相梧桐之挺特兮鳳凰翽而來止既鄙薄又不
潔兮謂伯夷之所以紛讒口之嫉妒兮羌惟聽而不味
也固衆人所一情兮謂夫人亦不異也彼自好猶弗珍

兮實譖人乎奚疑曰忠貞不可忱兮何貪婪而又不惑
言倡一而和百兮明智孰諒其允臧告曾參且殺人兮
母猶忪惕而惶惶傷白黑之混一兮竟莫察乎其故旦
恍恍以亘暮兮夕營營以連曙重曰世夢夢既不顯兮
又曷寃結而煩情上白日何皎皎兮庶幾猶鑒乎中誠
繫發辭其不衷兮揆於余又何有愆言申申以騁媚兮
終不究而寤寐昔人有明訓兮止謗曰無校曠來日其
悠遠兮庶秒忽兮猶覺

悼時賦 有序

明 王廷相

余謫毫之明年為正德己巳時政愈急抑鬱憤悶臥郡齋者數月乃賦以自釋其辭曰

何余生之弗獲於時兮熙和返而淒其固玄化之有變
革兮情沈抑而如危蒼梧邈而皇逝兮重華逝以何追
畢原蕪而鳳隱兮文胡為而在茲緊哲謨將以援世兮
衆咸難余之施豈弗省同流之為自全兮非素心之所
期虎九關而嚇衆兮鴉羣嘯而晝翔靈曜留其冥塞兮

兩儀黯黩而不彰，巉喬岳以路絕。兮江河廣而無梁，帝
遠而不照，余之忠誠兮。知進退之不余臧，諏同心以求
正節兮。曰聖哲之所常年鼎鼎，不余貸兮。恐清修之不
揚，希鳳鳥為友于兮。接文鵷為余侶，結薜荔以為紳兮。
帶芳杜與幽芷，余恃此以自媚兮。奚取容於羣子，苟終
獲此皜皜兮。雖沒齡而靡悔，彼飭婪而好進兮。余犯衆
忌而獲愆，恒申申以忠告兮。彼朋訾而不余然，嗟時命
之不可逭兮。矧毒夫之秉權在聖智，或靡周兮。余孱劣

而奚宣強心娛而偷安兮非道軌之所尚覽彭咸之茂
潔兮紛覲面於俯仰哀日暮而途迫兮胡不高駕而獨
往苟余蹤之可以遁滅兮又何情戀於吾黨涉洪河以
揚舲兮汎滄海之三洲登崆峒以發軔兮歷五嶽之崇
丘雲霧騰而蔽虧兮朝蓊蓊而吞舟叢萬嶮之不可越
兮叫帝閭而無由將東浮於三韓兮南走乎盤瓠之野
趨疏勒之龍沙兮及華胥於西夏遞重譯而靡通兮雖
語笑之莫辨俗淫悍而殊中土兮更陰陽之為沴云僻

陋之可居兮要情性之舒展吾生尚不自得兮何九夷
之為善超三山於鼇極兮棲神洲以為家友羽人以徜徉
兮接浮丘之靈槎駕玄蚪以遠遊兮折若木之瑤華
捫三辰而載歌兮凌倒景而迴車固蒙莊有此寓說兮
實杳茫之無據余豈貪生之常流兮迷異道而誣世諸
有求而莫獲兮反余聰而大觀余苟不畔於道槩兮行
窮困而志完矧沈冥為真詮兮終解脫乎憂患要時命
之可俟兮胡悒悒以長歎亂曰維河湑湑有泚清兮北

谷之窳蠹為陵兮，洛水滔天底平成兮。
理亂相禪靡常形兮，詹尹蓍筮蔑以徵兮。
卓彼高士遺厥榮兮，順命適變聖通明兮。
殷憂沖沖文伯興兮，履危俟時集爾慶兮。
委順抱一維士之貞兮。

惜毀賦

明 盧 柟

太陰為室兮，叢棧昏玄雲黢霽兮。
殺氣淪夔魍魎兮，笑兮鬼啾啾。
鼯鼠呻吟兮，虺蛇蟠蟻蝨鱗鱗兮。
被髮鬢精淫怵惚兮，軼上蒼聖澤霈兮。
澧澧周道砥兮，有平佼童兮。

輕佻駝陂陀兮逍遙俟兮趨志驕蹇越荒唐兮華渚
恫顙頽兮棄鷄鸞奇鵬鵠兮從嬉攀網罟繞被兮增
機綸捆徽繆窘觸兮殷懣結軫禍延考妣兮童穉離隕
室家丘墟兮弗霍茂隱冥身園牆兮玄夜長虹霓為孽
今日無光痛哭曼曼兮結帟招帝閭兮眇沫般自列兮
莫聞痛際天兮我柏往者逝兮匪追淑將來兮安宅檻
虎豹兮熊羆文威絕兮孰所為憲皇網兮冤頸反舊鄉
兮何期山龍從兮綠桂枝禽獸號兮援狄啼羈縻兮離

憂羌長苦兮物類我思

內答賦有序

明許應亨

嘉靖己亥七月之閏余從兄至京師道齊魯之墟中夜
無寐徬徨起坐悼往過之寢深懼將來之易溺忸怩中
熱撫几赧顏而作是辭

余往耽此奇徑兮顧中道而背馳極曠遊之快心兮決
轡御而不羈白日既下西麓兮竊獨處此纍畸魍魎蔽
於大澤兮山鬼迎將以噬石嘒嘒以躡足兮水澌澌以

披靡彼哲人立於高岡兮褰余裳戒以勿濟虎嶷嶷以
肆翼兮將以食子之肝肺余方憤而莫知兮神怳怳以
心醉忠言逆余之耳兮反迎之以罵詈披蒺藜以為衣
兮又紉之以為裳席荊棘以自娛兮雜蕝茨以佩囊孤
九首而襲嫗兮蛇蜿蜒以引吭涉流離而弗顧兮道嗟
哦以徜徉心搖搖而不寧兮體靡靡以皆傷妻子泣以
向余兮朋友招我以簡書此地不可以久處兮曷返子
之故居子烈祖之南徙兮固以振茲令圖洎乃考之仁

厚兮導繩墨而不踰伯追躅於古哲兮既為世之大儒
子獨何其不肖兮自喪子之嘉模夫人孰能無過兮貴
速改之惟謹昔殷王之齊聖兮曰不吝以為訓顏氏既
以不貳兮後世稱其亞聖苟朝作而暮改兮亦云天之
明命幸受恥過而作非兮墜洪業以隕軀有渾敦之長
傲兮聖人投之以四夷惡無纖而弗滅兮徽固積而不
虞鬼神福善而禍淫兮天培我而殛愚余雖聞而不繹
兮猶赧顏而忸怩乃已亥之孟秋兮膏吾車於北衢既

遠迹於塵陌兮遂肆志於詩書緬溽暑之既退兮又申之以秋初風蕭瑟以怒號兮氣抑鬱而莫舒月既望於西陸兮夜氣清而不渝達中宵而不寐兮獨慘慄而嘻吁昔嬰身於湯鑊兮痛百創之在膚譬狂藥之喪心兮赴水火而莫辭既號激於南北兮復跳梁於東西自安止於汙下兮惟狡童之是師蓋雖壯而猶弱兮氣方鼓而復摧曩幼學之聰慧兮竊自比於瓊瑤慕吾兄之高蹈兮將頡頏於青霄胡中道之廢墜兮滓異質以涇渭

使蘭茝雜於糞土兮豈云異夫蓬蒿雖往者之不可諫
兮懼來者之易淆諄曰宴安鴆毒不可親兮蝮首蠱尾
豈可矜兮君子明哲以保身兮孱士窮欲將戕生兮放
僻邪侈固桎梏兮戴仁抱義至公卿兮遷善改過有殷
之興兮長教遂非桀紂同征兮

左賦有序

明
王廷陳

夢澤子不善官見閔有司黜民乘之坐是拘繫自傷疾
惡反中乃作左賦辭曰

晝晦宵明川停嶽行隆冬劇燠六月而冰墮毛不揚石
舉輿升廢聲振韻奮雷霆無聲羣欣遂臭乃厭蘭芬猜鸞
駭鳳精糗飼梟仁躋德跼勁弧射堯恬海狎江隘瀆沈
舫風虎輟嘯土兕而號曠德既收聳司音矣彼之朦朧
五色分矣駿足則縛蹇服乘矣侏儒引臂上捫星矣醜
女專憐淑媛不御讎璧惠蠅踏巾首屨適郭捐達擇潦
而步賁獲閉勇征夫勁兮麓免折趾獵者競兮不根而
葉季為孟兮亂曰彼繳之鳥載拔其翎彼實醢酒謂爾

何醒寇踰其垣道寸寇以登彼田不治懟鄰之耕

御定歷代賦彙外集卷六

御定歷代賦彙外集卷七

懷思

懷思賦

晉夏侯惇

何天地之悠長悼人生之短淺思縱欲以求歡苟抑沉
以避免嗟聖王之制作所以貴夫善善信循道以從法
何世路之迍蹇始潔操以迄今每適道而靡違思典言
以攝事弗履過而循非恒戰戰以兢慄杜穢釁而防微

斂規節以踐跡冀天鑒之佑誠勤恭肅以端厲常苦心
而勞形桑榆淹其薄沒既白首而無成世務多故吾固
甘夫無為名不足以為尚空勞穢以自卑永無事以安
神幸歿世之無知

懷思賦

晉王

氏

劉柔妻

超離親而獨寄與憂憤而長俱雖亮分以自勉曾無間
乎須臾思遙遙而忉惻疾結滯乎肌膚憶昔日之歡侍
奉膝下而怡裕集同生而從容常欣泰以逸豫何運遇

之偏否獨遼隔於脩路彼恒鳥之將分猶哀鳴以告離
况遊子之眷慕孰殷思之可靡於是仲秋蕭索葍收西
御寒露宵零落葉晨布羨歸鴻之提提振輕翼而高舉
志渺眇而遠馳悲離思而嗚咽彼邁物而推移何予思
之難泄聊擘翰以寄懷悵辭鄙而增結

幽思賦

魏
曹植

倚高臺之曲隅處幽僻之間深望翔雲之悠悠羌朝霽
而夕陰顧秋華而零落感歲暮而傷心觀躍魚於南沼

聆鳴鶴於北林搦素筆而慷慨揚大雅之哀吟仰清風
以歎息寄余思於悲絃信有心而在遠重登高以臨川
何余心之煩錯寧翰墨之能傳

愁思賦

魏
曹
植

四節更王兮秋氣悲遙思愴恍兮若有遺原野蕭條兮
煙無依雲高氣靜兮露凝璣野草變色兮莖葉稀鳴蜩
抱木兮鴈南飛歸室解裳兮步庭前月光照懷兮星依
天居一世兮芳景遷松喬難慕兮誰能僊長短命也兮

獨何憊

愁思賦

魏繁 欽

何旻秋之慘淒處間夜而懷愁潛白日於玄陰翳朗月
於重幽零雨濛其迅集潢潦汨以橫流聽峻階之回雷
心沉切以增憂嗟王事之靡盬士感時而情悲願出身
以徇役式簡書以忘歸時陟岵以旋顧涕漸纓而鮮晞
聽鳴鶴之哀音知我行之多違悵俯仰而自憐志躑躅
而摧威聊弦歌以厲志勉奉職於閨闈

述思賦

晉陸機

情易感於已攬思難戢於未忘嗟伊思之且爾夫何往
而弗臧駭中心於同氣分戚貌於異方寒鳥悲而饒音
衰林愁而寡色嗟余情之屢傷負大悲之無力苟彼塗
之信險恐此日之行晁亮相見之幾何又離居而別域
觀尺景以傷悲撫寸心而悽惻

行思賦

晉陸機

背洛浦之遙遙浮廣川之裔裔遵河曲以悠遠觀通流

之所會啓石門而東紫泝汴渠其如帶託颼風之習習
冒沉雲之藹藹商秋肅其發節玄雲霈而垂陰涼風淒
其薄體零雨鬱而下淫覩川禽之遵渚看山鳥之歸林
揮清波以濯羽藏綠葉而弄音行彌久而情勞途愈近
而思深羨品物以獨感悲綢繆而在心嗟逝官之永久
年荏苒而歷茲越河山而託景眇四載而遠期孰歸寧
之弗樂獨抱感而弗怡

遐思賦

晉鍾

氏

妻王渾

唯中秋之慘悽百草萎悴而變衰燕翔逝而歸海蟋蟀
鳴而相追坐虛堂而無聊嗟我心之多懷悵遐思而內
結嗟爾姜兮藐不我留諒民生之未幾吾何為其多愁
涼風蕭條露沾我衣憂來多方慨然我懷感飛鳥之還
鄉詠衛女之思歸於是周遊客與逍遙彷徨悲民心之
局曲願輕舉之遐翔

遊思賦

宋 鮑 昭

雲徑兮海衝上潮兮送風秋水兮駕浦涼煙兮冒虹暮

氣起兮遠岬黑陽精滅兮天際紅波沄沄兮無底山森
森兮萬重平隰兮亘岬通川兮瀉壑仰盡兮天經俯窮
兮地絡望波際兮曇曇眺雲間兮灼灼乃江南之斷山
信海上之飛鶴指煙霞而問鄉窺林嶼而訪泊撫身事
而識苦念親愛而知樂苦與樂其何言悼人生之長役
舍堂宇之密親坐江潭而為客對蒹葭之遂黃視零露
之方白鴻晨驚以響湍泉夜下而鳴石結中洲之雲蘿
託縣思於遙夕瞻荆吳之遠山望邯鄲之長陌塞風馳

兮邊草飛胡沙起兮鴈揚翩雖燕越之異心在禽鳥而
同戚悵收情而枝淚遣繁悲而自抑此日中其幾時彼
月滿而將蝕生無患於不老奚引憂以自逼物因節以
卷舒道與運而升息賤賣卜以當壚隱我耕而子織誠
愛秦王之奇勇不願絕筋而稱力已矣哉使豫章生而
可知夫何異乎叢棘

征思賦

宋 傅 亮

逢休明之餘祐託菲薄於末暉既致戎於皇幄亦備官

於宰闈傷鵜梁以載揚詠伐檀而屢思和風翕以首節
零雨鬱而四垂津雲暖以合體墳衍杳其無封羨歸飛
之能矯樂湍流之自東想和鑒之北徂企雲旗之西舉
灑三川之積塵廓二嶠之重阻覲高掌於華陽聆鳴鳳
於洛浦

離思賦

有序

魏曹植

建安十六年大軍西討馬超太子留監國植時從焉意
有憶戀遂作離思賦云

在肇秋之嘉月將耀師而西旗余抱疾以賓從扶衡軫而不怡慮征期之方至傷無階以告辭念嗣君之光惠庶沒命而不疑欲畢力於旌麾將何心而遠之願我君之自愛為皇朝而寶已水重深而魚悅林脩茂而鳥喜

離思賦

晉左九嬪

生蓬戶之側陋兮不間習於文符不見圖畫之妙像兮不聞先哲之典謨既愚陋而寡識兮謬忝廁於紫廬非草茅之所處兮恒怵惕以憂懼懷思慕之忉怛兮兼始

終之萬慮嗟殷憂之沈積兮獨鬱結而靡訴意慘憤而
無聊兮思纏綿以增暮夜耿耿而不寐兮魂憧憧而至
曙風騷騷而四起兮霜皚皚而依庭日晡暖而無光兮
氣慟慟以烈清懷愁戚之多感兮患涕淚之自零昔伯
瑜之婉孌兮每綵衣以娛親悼今日之乖隔兮奄與家
為參辰豈相去之云遠兮曾不盈乎數尋何良集之清
切兮欲瞻覩而莫因仰行雲之歔歔兮涕流射而沾巾
惟屈原之哀感兮嗟悲傷於離別彼城闕之作詩兮亦

以日而踰月况骨月之相違兮永緬邈而兩絕長含哀
而抱戚兮仰蒼天而泣血亂曰骨月至親化為他人永
長辭兮慘愴愁悲夢想魂歸見所思兮驚寤號咷心不
自聊泣連泗兮援筆抒情涕淚增零訴斯詩兮

離思賦有序

明 魏學洙

乙卯春季家大人北之文安時序如流忽爾感烈離思
耿耿爰造斯篇情而不文亦聊以自摠也辭曰
憶陽春之恢台兮擘垂楊之青青將余親於江皋兮屯

余行其矻竦數辟咀余頻詔兮逝將去此而遐征各懷
懷其弗繹兮中愴怛而難平陟嶢巖以周覽兮覩大江
之滔滔道曼曼其靡極兮愾礧礧之怒濤恍齊魯之在
望兮迷颺颺之颺颺萍島汨其浮沒兮衝風動夫布袍
意徘徊而罷眺兮步徙倚乎彼皋勉商略江山之奇勝
兮志奄奄其不豪載宿宿以俶裝兮命歸者先解維乘
潮水之迅駛兮撫中心而不夷願及行之未遠兮更一
見而致辭計淹留其終別兮強自割而遂馳道晉陵之

殷麟兮踰姑蘇之燭爛出新詩於輕簾兮吟數章而永
歎涕靈靈其若霰兮神溶溶而無畔馮惆悵以獨返兮
癩憂集而怙怙既傷兒之懷親兮重傷親之念兒戒歸
懼令適發兮還三復而眈之匪無則言以自壯兮寫中
曲乎兩眉孰有恨而非別兮孰有別而不思佯婆婆其
媮樂兮各不言而相知羌姜約以自廢兮憐風日之淒
其既駕檣櫓兮臨迴道之三千歸期勿可道兮行遠繇
乎歲年肇發棹於吳會兮轄將弛乎幽燕遘女魃之僂

舞兮路遠邇而不前桃李漂落以道盡兮榴火歛而復
然頃艾虎其縈懷兮又聞江南之采蓮跋鳥不可與儷
偕兮草木芸芸其屢遷傷征途之躑躅兮忽涕泗之流
漩石圻沸焦煙兮望錢塘而駐旆蹈赤坂之赫威兮蹇
傍徨以賴跼歔愁愁其若撼兮懷余親而長嘅去衡泌
之肅冷兮服頑沙之颺塏荃不堪此蘊隆兮矧羈旅之
狼狽臆怫鬱以繚悵兮恒假寐而獨怖惚忻忻其承顏
兮或髣髴乎既歸盱余目而莫覲兮羌厭浥其漬幃每

惆恍以竟日兮留夢境而弗違鴈翩翩南翱翔兮寄兒
以新橐憎世路之露晷兮鳴吾鼎之為寶鱣鯨裁於螻
蟻兮虎豹吼而當道鳳凰班於天門兮覽九苞其猶未
保挾蓬矢無肅心兮徒傷謀生之草草兒願及年之方
將兮懷夜光而粥之薰椒桂與木蘭兮輯翠羽之陸離
苟善賈其可俟兮將良弓以為箕出門邁夫文窮兮羣
衆兆而見嗤送裘馬於五陵兮什敝貂而自私天實構
此西日之局兮詎責獲之可為恠愁約以侏條兮志遠

連其俞亢塊獨處此窮簷兮倚斜陽而四望感嚴威之
感發兮俄飈涌以跳過女機杼而士喟兮幸家人之無
恙曰坎坎其育鞠兮獨有行乎四方俱昕夕而匪所睨
兮知永懷夫故鄉跂游雲以攬涕兮霑余袂其浪浪辭
曰人生孰無別離兮恃來者之可期幼不誦夫甫田兮
曷怛怛其相思

別思賦

明何景明

君何為兮遵脩途以長徂俾予懷之弗怡曠悅愴而罔

憇顧左右而若遺莽川陸之迴薄迴城闕之逶迤山翳
翳而景入林蒼蒼而鳥稀拂清霜而採松迎夕露而折
葵托涓忱於微贈諒予志之可追皎秋日以矢心指歲
寒以為期俟行塵之我延臨晨風而褰衣

後別思賦有序

明何景明

伯川將之河西予既為別思賦矣及王舍人文熙館為
別予以事不得往為之快然乃紆鄙懷為後別思賦
懷諸彥之雅趣款行客以終宵慨離違之多端接晤語

而逍遙時乃御閒館即別院天冽冽而疾飈月霏霏而
微霰開重簾之華燈飛逸翰於清讌締久要而莫渝顧
暫睽而益眷瞻芳塵之未遐仰光惠而引領恍予神而
奮馳悵予駕之弗騁覽歲事之遲暮延軒楹之夕景葉
歷歷以辭秋霜淒淒而凝冷顧征鴻之稍滅戀行雲之
佇影送夫君以申佩寄一感於茲遊悼霖澤之久愆恐
江河之不流矧庶役之未蠲固凋瘵之所由懲舊途之
仆軌濟巨川而思舟楫吾道而罔屈何令名之不修傾

風譽於咫尺日結睇於河洲

思親賦

晉
陸機

悲桑梓之悠曠愧蒸嘗之弗營指南雲以寄款望歸風而效誠年歲俄其聿暮明星爛而將清迴飈肅以長赴零雪紛其下頽羨纖枝之在幹悼落葉之去枝存顧復之遺志感明發之所懷居辭安而厭苦養引約而推豐忘天命之晚暮願鞠子之速融兄瓊芳而蕙茂弟蘭發而玉暉感瑰姿之晚就痛慈景之先違天步悠長人道

短矣異途同歸無早晚矣

思親賦

明王 禕

仰蒼旻之冥漠運玄化之混沌何賦授之殊致或偏頗而不均撫予身之薄祐慨此生之多屯豈造物之見靳將受命之匪辰歲越在乎稚齡倏棄捐乎嚴君曾志學之未逮已過庭而無聞寄眇眇之弱植托微微之孤根灑血淚於枯栢結哀號於愁雲蓼莪之既深幸菽水之可樂調旨甘於脩瀝糝餘粒於藜藿躋積雪而筍生

斲層冰而鱗躍奉慈訓之溫恭承懿範之柔恪雖罔極之莫忘固終養之有託急景不息芳年易徂曷致三釜曷貴重壚恐令名之不振使先猷之弗舒奉堂上之明命離膝下之深娛乃辭故里乃游名區薦紳是從冠蓋為徒摘麗藻於淮浙覲清光於皇都朗節矯以遐奮蜚聲韡其旁敷嗟功名之蹭蹬慨日月之居諸處違離以自適與憂憤而長俱盼丘園之雨寂睠桑梓之雲腴烝嘗邈其弗逮溫清俟其久疎豈初服之難返念夙素之

已渝感風樹以浩歎閔燧穀而長吁至若青陽布和緝
景騰美風揚柔飈日轉華晷雖行樂而何歡恨承顏之
非邇朱明啓節南薰奏琴果散嘉實樹聯芳陰枕炎蒸
其孰理襟邑鬱而莫任灑露宵零嚴霜晨被阪遠姜蘭
隰空摧槎鴈哀哀以翔霄葉蕭蕭而隕地怵此日之苦
思激往年之餘涕玄冥臨御重陰固寒蕭條徼塞搖落
鄉關日韜光而弗耀川積凍而成乾伊天意之猶慘豈
物情之能歡矧予懷之含瘁固觸景而增酸惟四時之

推移靡一息之停緩年既迫於喜懼日宜較乎長短指
白雲之在望緬丹丘其未遠遡歸風而效誠藉流月以
寄款儻微榮之可養固遠遊之焉敢閔干祿以辭親會
為吏而踰險在往指其猶然可吾儕之不勉誓至思之
少酬期餘生之無忝持寸艸之微心報春暉於未晚獮
設祭以報本烏反哺而效慈彼蠢蠢之細物亦靈明而
有知察妙理以彌戚曠大觀而遐思悵意長而語短聊
擘翰以陳詞

孝感賦

宋 謝靈運

舉高檣於楊潭眇投迹於炎州貫廬江之長路出彭蠡
而南浮於時月孟節季歲亦告暨離鄉眷壤改時懷氣
戀丘墳而縈心憶桑梓而零淚孟積雪而抽筍王斲冰
以鱠鮮美柔葉於枯木起春波於寒川顧微心之庸褊
謝精靈於昭晰擁永暮而莫從曾遐感而靡徹

孝思賦

有序

梁武帝

想緣情生情緣想起物類相感故其然也每讀孝子傳

未嘗不終軸輟書悲恨拊心嗚咽年未髫鬢內失所恃
餘喘玲孌嫗相長齒過弱冠外失所怙限職荆蠻致
闕晨昏江途遼遠家無指信髣髴行路先君體有不安
晝則輟食夜則廢寢方寸煩亂容身無所便投刺解職
以遵歸路於時齊隋郡王子隆鎮撫陝西頻煩信命令
停一夕明當早出江津送別心慮迫切不獲承命止得
小船望星就路夜冒風浪不遑寧處途次定陵船又損
壞於時門賓周仲連為鵲頭戍主借得一舸奔波兼行

屢經危險僅而獲濟及至戾止已無逮及五內屠裂肝
心破碎便欲歸身山下畢志墳陵長兄哀愍未說獨行
續有北問狡虜寇邊朝廷以先君遺愛結民咸思在昔
故舊部曲猶有數千武慶宗將領留防彼鎮時便有旨
使捍壽春王事靡鹽辭不獲免刺史崔慧景志懷翻覆
遠招逋逃多聚姦俠大猾凶醜莫不雲集至如彭盆韓
元孫等不可稱數倍道電邁奄至淮淝凶徒疑駭相引
離散臺軍主徐玄慶房伯玉等欲襲取慧景乃固禁之

方得止息是歲齊明作相疑論未決密馳表疏勸徵慧
景折簡而召必不違拒即重遣還以安其心姦渠既出
緣邊無虞旬朔之間慧景反鎮即便解甲以歸京師因
爾驅馳不獲停息數鍾百六時會雲雷撥亂反正遂膺
四海念子路見於孔丘曰由事二親之時常食藜藿之
食為親負米百里之外親沒之後南遊於楚從車百乘
積粟萬鍾累茵而坐列鼎而食願食藜藿之食為親負
米不可復得每感斯言雖存若亡父母之恩云何可報

慈如河海孝若涓塵今日為天下主而不及供養譬猶
荒年而有七寶飢不可食寒不可衣永慕長號何解悲
思乃於鍾山下建大愛敬寺於青溪側造大智度寺以
表罔極之情達追遠之心不能遺蓼莪之哀復於宮內
起至敬殿竭工匠之巧盡世俗之奇水石周流芳樹雜
沓限以國事亦復不能得朝夕侍食惟有朔望親奉饋
奠雖復得薦珍羞而無所瞻仰內心崩潰如焚如灼情
切於衷事形於言乃作孝思賦云爾

感四氣之變易見萬物之化成受天和而異命稟地德而齊榮察螭螟於蚤睫觀鯢鵬於北溟彼含識而異見同有色而殊形雖萬類之衆多獨在人而最靈禮義別於飛走言語異於鸚猩念過隙之儻忽悲逝川之不停踐霜露而悽愴懷燧穀而涕零掩此哀而不去亦靡日而弗思仲由念枯魚而永慕虞丘感風樹而長悲雖一至而舍生奉二親而何期思因情生情因思起導情源以流澍引思心而無已旣懷憂以終身亦銜恤而沒齒

當閒居以永念獨拊膺而自傷徒升岵而靡瞻空陟屺
其何望涕縱橫以交流血沸涌而沾裳覽地義以自咎
懼滅性之乖方仰太極以長懷乃告哀於昊蒼冀皇天
之有感何報施之茫茫曉百碎於魏闕夜萬斷於中腸
心與心而相續思與思而未央晨孤立而縈結夜獨處
而徊徨氣塞哀其似噎念積心其若狂至如獻歲發暉
春日載陽木散百華草列衆芳對樂時而無歡乃觸目
而感傷朱明啟節白日朝臨木低甘果樹接清陰不娛

悅於懷抱但罔極而纏心蒹葭蒼蒼白露為霜涼氣入
衣淒風動裳心無迫而自切情不觸而獨傷若乃寒冰
已結寒條已折林飛黃落山積白雪旅鴈鳴而哀哀朔
風鼓而颼颼目觸事而破碎心隨感而斷絕無一息而
緩念與四時而長切年揮忽而莫返時瞬眴其如電想
慈顏之在昔哀不可而重見痛生育之靡咎報顧復而
無片悲與恨其俱興涕雜血其如霰燕青春而差池鴻
素秋而翱翔去來候於節物飛鳴應於陰陽何在我而

不爾與二氣而乖張常茹酷而輪迥歷日夜而不忘既
視丹而成綠亦見白而為黃擾性情以翻覆汨神慮而
迷荒想鳴鶴而魂斷聽孤雛而心死慟終天而無怙號
畢世而靡恃觀休屠之日碑宣教義之所及見甘泉之
畫像每下拜而垂泣忽心動而不安遽入侍於帝室值
何羅之作難乃舍之以投瑟超王臣之稱首冠誠勇而
無匹士行已之多方見石他之有權身雖死而名揚乃
忠孝而兩全顧丁蘭其何人家河內之野王時舞象而

方及始成童而親亡刻木母以供事常朝夕而在傍劉
鎮就養而不暇常遠汲而力寡苦節感於幽靈醴泉生
於竈下顧長沙之臨湘有古初之道始時父沒而未葬
遇鄰火之卒起乃伏棺而長號雨暴至而火死又何琦
其亦然獨樞屋而全止至如王祥黃雀入帳隗通橫石
特起盛彥之開母目邢渠之生父齒覽斯事而衆多亦
難得而具紀靈蛇銜珠以酬德慈烏反哺以報親在蟲
鳥其尚爾況三才之令人治本歸於三大生民窮於五

孝置天地而德盈橫四海而不撓履斯道而不行吁孔
門其何敎

罔極賦

宋 王禹偁

後周廣順太歲甲寅季秋戊子實生吾身稟粹和於兩
儀荷鞠育於二親粵自始孩逮乎成人求名得名干祿
得祿痛吾母之早終受君羹而舍肉丁吾父之大憂徙
倚廬以食粥被朝恩之抑奪履人事而悽迷五鼎或來
羨仲由之斗米三牲縱具非茅容之隻雞豈無兄弟各

懷祿而悽悽亦有子孫方嬉戲乎孩提冗食兮紀綱之
僕多病兮糟糠之妻望松楸以暮泣履霜露而晨啼今
日何日家人舉爵祝我壽考勸我歡樂或懸弧於茲晨
念陟岵而淚落換斑衣兮純素變華顛兮總角孰謂儒
者不如農夫良田十畝柔桑百株無求於人身何憂其
悔吝必出於力養不間乎精麤父母俱存緼袍重襦子
弟匪懈夕耕曉鋤雞豚掩豆黍稷盈壺草堂為壽其樂
只且嗟乎吾不得而及也賦罔極而長吁

倚門望子賦

五代 梁 高

蒼蒼茫茫道遠倚倚望望情傷念蕩子之久別投慈心
於遠方渺渺何之動幽懷於眷戀滔滔不返向上國以
觀光當其截髮投師操心托迹遙望皇都俯登紫陌嚙
臂於衛國門前題柱於升仙橋側擔簦日久希寸祿以
資榮負米程遙仗何人而請益征輪遽斷別騎塵飛涕
眸睽睽凝思依依欲歷而既升雲路遙憐而獨倚柴扉
汨沒難明我則每晨昏而悵望宗枝有托汝盍無早晚

以言歸常曠望於煙霄每淒涼於蓬蓽杳杳兮故路寂
寂兮舊室幾行鴈陣空來萬里尺書難述水聲山色遽
驚懷古之人別恨離情愁對秋風之夕眷戀徘徊愁心
靡開抑鬱之情恒自切湮淪之事有誰哀念一葦於津
涯誠難去矣聽孤鴻於碧落得不忍哉想彼淹留傷乎
離索躊躇兮不止優游兮何托盈庭之萱草徒榮滿眼
之蘆花自落楊朱陌上蕭條而恨淚潛潛漢武臺邊宛
轉而殘霞漠漠悵陸海之高深念行役以難尋憶昔伯

俞之志寧無泣杖之心對月而常憐獨坐聞蛩而每憶
寒吟動茲懷土之思為憑蜀魄觸爾還鄉之計暗託秋
砧我我仲丘殷勤士子獻書之疏復何如干祿之心幾
時止遣我日日望紅塵未見此心終未已

思舊賦

有序

晉向秀

余與嵇康呂安居止接近其人並有不羈之才然嵇志
遠而疎呂心曠而放其後各以事見法嵇博綜技藝於
絲竹特妙臨當就命顧視日影索琴而彈之余逝將西

邁經其舊廬於時日薄虞淵寒冰淒然鄰人有吹笛者
發聲寥亮追思曩昔遊宴之好感音而歎故作賦云

將命適於達京兮遂旋反而北徂濟黃河以汎舟兮經
山陽之舊居瞻曠野之蕭條兮息余駕乎城隅踐二子
之遺跡兮歷窮巷之空廬歎黍離之愍周兮悲麥秀於
殷墟惟古昔以懷今兮心徘徊以躊躇棟宇存而弗毀
兮形神逝其焉如昔李斯之受罪兮歎黃犬而長吟悼
嵇生之永辭兮顧日影而彈琴託運過於領會兮寄餘

命於寸陰聽鳴笛之慷慨兮妙聲絕而復尋停駕言其
將邁兮遂援翰而寫心

懷舊賦

有序

晉潘岳

余十二而獲見於父友東武戴侯楊君始見知名遂申
之以婚姻而道元公嗣亦隆世親之愛不幸短命父子
凋殞余既有私艱且尋役於外不歷嵩丘之山者九年
於茲矣今而經焉慨然懷舊而賦之曰

啓開陽而朝邁濟清洛以徑渡晨風淒以激冷夕雪曷

以掩路轍含冰以滅軌水漸軻以凝沍塗艱屯其難進
日晚晚而將暮仰睇歸雲俯鏡泉流前瞻太室旁眺嵩
丘東武託焉建塋啓疇巖巖雙表列列行楸望彼楸矣
感於予思既興慕於戴侯亦悼元而哀嗣墳纍纍以接
隴栢森森以攢植何逝沒之相尋曾舊草之未異余總
角而獲見承戴侯之清塵名余以國士眷余以嘉姻自
祖考而隆好逮二子而世親歡攜手以偕老庶報德之
有鄰今九載而一來空館闕其無人陳芳被於堂除舊

圃化而為薪步庭廡以徘徊涕泣流而霑巾宵展轉而
不寐驟長歎以達晨獨鬱結其誰語聊綴思於斯文

思賢賦

梁丘遲

豈顧問哉相然信死斯則結深念於撫翼跂雄飛而但
起知我於財利之間何足多於鮑子目擊而道存至味
其如水未見其人吾聞其理矣夫子長之託意甘執鞭
於異世在慈明之慕義聊慙馭而追稅況至德之可師
無兼表以共敝有樂安之任子偉羣才而稱傑備百行

之高致該九州之洪藝諒可雜而非染迹每同而常別
牆易入而難窺闕無鍵而有閉思若神而泉涌翰如雲
而積袂沉潛於懷抱之間蕭散於天人之際日下愧其
未雙關西慙於上哲紛吾既有此固陋荷君子之渥惠
塵非府而分深葉未移而好結尋宿草之宴處歷三紀
於茲日性有同於杞梓心獲變於丹漆文何屬而不辯
理何疑而匪質問不休而鐘叩答無窮而座謚

懷賢賦 有序

明 郭 棐

士子冬偕張伯鄰赴試南省道出長沙昔漢賈太傅左
遷其地感墜馬而歔歔竟賦鵬以淪逝遊者輒增慨焉
夫太傅起弱冠抗疏漢廷其通才朗識直氣雄文當時
碩儒未之能儷洵一代豪賢哉追慕高風用綴賦言

維困敦之陽月兮余北征而溯長沙乘流風以鼓楫兮
懷往躅而咨嗟繫太傅之懿美兮天畀之以脩能抱貞
白而不阿兮遭蒙霧而叢嗔棄赤電驟耳而弗馭兮謂
款段之猶龍羌陳詞於未央兮竟出傳於藩封澹容與

而去國兮蹇胡為乎中路心懔懔而蘊結兮情依依而
回顧披楚氛而不敢怨兮念宣室而不能忘弔靈均於
汨羅兮歌離騷而傍徨濯湘水以自潔兮紉秋蘭之芬
芳苟心曲之無瑕兮雖隕穽其何傷噫嘻薰蕕混臭兮
松蘿倒植土鼓雷鳴兮天球若礫萋斐貝錦兮廉貞屏
斥醜正為邪兮緣曲詆直自古皆有此兮豈先生之獨
盡是故比干剖心仲尼削迹子奇履霜萇弘血碧虞卿
窮愁韓非憤戚伍員投淵申徒抱石或幽繫於南冠或

遭別於荆璧或三黜而不回或一言而輒叱美固惡其
獨擅兮名不可以早揚誠知前轍之搖軌兮又不能突
梯滑稽與世而徜徉燦予心於皎日兮未改此度鳳翩
翩其高舉兮豈下羣乎雞鶩歲睽睽其飈逝兮途歷歷
其紆長遠紫闥而觀玄扈兮恐多歧而亡羊嫫女妒其
蛾眉兮固恒態也懷瑾握瑜而見擯兮又何怪也睽帝
閭以長顧兮知丹衷之不能諛悼先生之瓌特兮迺長
籌而短算綰予棹以徘徊兮心倏倏而悲思氣鬱結而

不可平兮緬流風而薦辭

贈言賦

有序

梁蕭綸

張雲麾間望之美作牧南蕃維舟江漢留連飲餞發邁
有期會面無日依依別袂恨恨江干古人贈別以言聊
為贈言賦曰

昔人有感於知己深情投分如斯已矣相知勢利之間
實君子之所鄙靜言神交之際亦難得而具美豈直鮮
其令終曾自聞其善始日踰久而益敬蓋惟一人者爾

語同志而好合諒今古之皆然苟託御而自說徐因芻
而請前况英聲與茂實乃絕後而光先似臨潭而對鏡
若披霧而見天欽愛顧之罔已良佩服之在旃資淑美
之上才超羣雄而獨峻德既深於萬頃牆有高乎數仞
思若神而泉湧文如華而玉振伊薄軀之固陋謬攝官
於夏汭知美錦之難裁處勢絲而易結幸中途而邁止
仰旌旆之踟躕似德星之東邁類祥雲之西徂亟留連
於河渚或終宴於城隅賞既延於賓友歡亦洽於僕夫

嗟灰琯之易逝慨離袂之云促惜日車之不駐恨流影之難續觀善誘而不倦餐好音而未足佇浮雲之可寄願無比乎金玉

懷音賦

有序

梁張纘

西平邵陵王以親賢近能作蕃夏首下走叨竊時命驅傳相羅久託下風素蒙淑顧及塗經鄢郢淹泊累旬君王彈隋珠於千仞乃貽之以麗則詩云懷我好音敢為懷音賦云爾

伊宗周之令望巡召南而述職襟帶鄖夏之鄉宣條江
漢之域服詩書於懷袖抱仁義於胷臆總九德以棲身
橫四溟而撫翼循微躬之末迹謬馳傳於衡嶷由洞庭
而左轉指鄱醴而為期仰芳塵於夏汭路將近而彌滋
棹陵波以遙鶩舟望浦而倦遲自清光之未覲逾一紀
以歷茲敢憑情於往昔逢君恩之未遺陪桂苑之良遊
接蘭臺之高會既醉酒以飽德亦傾羞而緩帶感平原
之愛客傷岐路之難留戀西園之餘賞泣南浦之徂舟

結煩言於將贈情有重乎琳球顧龍門其不見過夏首而西浮申服義之未沫長寄言於還郵

導游賦

有序

元
袁
桷

陳郡袁桷家於甬之隅足不踰閩而四方交游往復之義亦能舉其槩聞吳興子昂趙子清名雅言為作導游賦道余所蘊亦以見夫思其人而不可見之意辭曰

嘗悲乎好游之士閱終歲而莫聞非秉志而媚私亦飾行以矯羣方其命車於王良假驂於造父過屠繒之沛

弔絃歌之魯許身結志慷慨偃僂抗銅盤以矢辭握幽
蘭而結賦炫華堂之冰雪眇脩途之霜露蓋將修斷金
之利雖閱牆而莫我敢侮息肩於門晞髮於廬不一歲
月迨見夫蠅聲而訶倚楹而吁雖千里之異殊何老壯
之卒逾也世有索居肥遯塹門塞竇尊委俚之間友汗
青之朽是猶談智於尺寸測日於戶牖猛虎嚙嚼幽猱
悲啾獨行無儔謹操其翰策彼一士與時偕藏具大塊
之清淑服忠厚以自昌余將往而未得倚吳山以相望

振衣中庭萬籟寂玄頎形廣顙眇兮翩翩墜余以言曰
懷辛之椒人或議其妖克梁之木人或惡其獨夫既自
以為直而亦豈不以為曲阮生自持幾於目語削木已
漫假手於祖匪達人之曠羈終察察乎廉隅余蹶然而
笑喟然而思拂龜以占莫測其疑抑搔首而歎噓故髣
髴以致期遂申之以辭連城之璧佩以容兮環龍之劍
喜其鋒兮伊若人兮物不可同兮我欲從兮樂有終兮
江山兮復長方舟兮可杭詞未竟童子擁篲而前曰豈

所謂千載之人邪吾當從子而西矣

求友賦

元 趙孟頫

思古人之不可見兮心鬱結而不舒登高丘而遠望兮
獨歎慨乎增歔波洋洋其汜濫兮欲濟而無航膏吾車
而孤往兮山鬱乎其蒼蒼四顧闐其寂寥兮思蹇產而
不鑠采衆芳以自娛兮聊假日以愉樂蹇長洲之夫容
兮擘大澤之蘭茝擷江離之秀穎兮結秋蘭以為佩世
俗方尚同兮余獨異乎今之人謂蘭茝為不芳兮蛾眉

枉之以善姪衆不可以戶說兮歷年歲而覲閔變心以
從俗兮而吾又不忍徯朝陽之鳴鳳兮企空谷之白駒
何驚駘之衆多兮鷄雀紛其瞿瞿寧飢渴以需時兮恥
屬饜乎腥腐古道久其弗繼兮吾惕焉為此懼何美人
之好脩兮獨與余其同心懷余以厚德兮遺余以好音
世固有同居而不察兮何千里而能同亂荆江之滔滔
兮涉遠道以相從覲清揚之信美兮懷盛年而莫當子
濯足於東海兮晞髮乎扶桑吸沆瀣以為飲兮餐朝霞

以為糧被列星之粲爛兮抱明月之夜光駕青雲而高
馳兮鳴和鸞之鏘鏘擾蒼龍使挾輶兮服白虎以驅不
祥願發軔其勿亟兮聊弭節而抑志指黃昏以為期兮
夫孰遠而弗至亂曰鹿鳴呦呦猶求友兮曾謂斯人不
如物之知兮獨行無儔吾將與子為類兮

思友賦

元涂幾

步平原之春雨蹇綠陰以成幄懷美人於山丘悵音書
之寥邈時也光風泛叢綠水揚波女條桑而侶行男負

薪而載歌，靄靄幽谷。娟娟薜蘿，良朋不來。流光蹉跎，慨
嘉樹之生仁，將遺余以秋實。孰伊人之靈哲，不反求而
有獲。屏葩華之浮辭，奉溫恭之明式。儻精微之可期，庶
永保乎貞吉。

思友賦

明 夏邦謨


何繁思之糾結兮，中悶瞀以罔休。晝屢餐而調饑兮，寧
膳餼之匪羞。夢雜糅以恍惘兮，曼旅夜之悠悠。息壅翳
其煩促兮，心震蕩而若浮。氣鬱鬱以填臆兮，淚熒熒而

張眸志沉抑而慊慊兮魂離散而難收罹顛躓以厄窮
兮茲遷逐於海陬哀蕪城之卑濕兮古淠廣之所都形
孑孑而窘束兮竊滯此其窮途覽芳菲之變化兮恒感
物以增愁獸求曹而躑躅兮鳥失侶而啁啾矧離索之
悽惻兮顧寂歷而無儔寥廓落而冥冥兮阻容與以優
游極兄弟於四海兮偉曠士之徽猷人固各有所志兮
焉深淺其相侔豈不語洽而貌澤兮惟知心之難求慨
仲身之多類兮得鮑叔而攄幽僑札相感於傾蓋兮或

獻紆而縞酬仰尼父之禮瑗使兮慕贈處於回由世重
陳雷之懿行兮況以膠漆之相投王貢出以類聚兮慶
廉義以為疇古固敦斯軌躅兮余於是之敢偷伐木興
刺於鳥鳴兮谷風以棄予為仇張陳隙以反目兮蕭朱
卒判然其相矛悲夫人之昧昧兮胡纖介而成訕喟斷
金之日遠兮懼麗澤之皆流時矯首以遙望兮眇雲木
之相樛負山川之蔽虧兮邈傳置之迴脩月輝輝而照
夜兮霜稜稜以驚秋風蕭蕭而振樹兮雨汨汨以沉丘

情縹緲以快悵兮然侘傺而夷猶懷孤憤以紆鬱兮邇
迴腸而優柔嗟百歲之易邁兮胡歡寡而多憂當其羣
嬉而愉樂兮寧知愁苦而淹留欲翦迹而橫逝兮非弱
質之勝耒欲蕩志以怡悅兮畏淫肆之為尤固自厲其
不豫兮惟靜默之相收庶尚友於古人兮考往則以臧
謀

御定歷代賦彙外集卷七



總校官庶吉士臣張能照
校對官編修臣周厚輅
校對官編修臣楊壽楠
謄錄監生臣徐掄元
謄錄監生臣阮坦